

[Augsburg], 13. August 1562

An Joachim Camerarius d. Ä.

BSB, Clm 10370, Nr. 282.

Clarissimo viro, D. Ioachimo Camerario etc. Domino et amico suo colendo. Leipzig.  
 S. P. D. Iisdem literis, Clarissime vir, et lugendi et gratulandi occasionem mihi praebuisti: lugendi, propter obitum Homilij, qui et te genero charissimo, et Academiam insigni Mathematico priuauit: gratulandi, quod Ioachimum F[ilium] et laureola ornatum καὶ πολλῶν ἀνθρώπων ἄστεά τε ἰδόντα καὶ νόον γνόντα propediem expectas. Sic enim ipse 14 Cal[endas] VIIlis ad me scripsit, se caloribus praeteritis, Insubriae parte visa, circiter Cal[endas] Octobris aut citius ad suos Deo adiuuante redire constituisse. Haec enim ferè eius verba sunt. Faxit Deus vt illius redditus laeticia, luctum istum iustiss[imum] illum quidem, obruat. Neque dubito quin pro tua sapientia τὴν φορητὴν λαβήν ταύτην perpetuo et prensare et tenere soleas. Id quod et ipse τῷ ἐπικτήτῳ πειθόμενος facere conor. Sic enim meae quoque res postulant. Nec enim valetudo tenuis ac potius nulla et perdata me quietum esse sinit, et accedunt ἀδελφικὰ κακὰ ποικίλα. Nunc etiam τὰ δεσποτικὰ, vt μετοικεσίαν necessario cogitem, nec tamen vllum commodum receptum inueniam. Vxorem ducere si non serum, at infirma valetudine periculoso est. Ancillarum verò fides quae sit in hac vrbe, nisi δεινή τις οἰκονόμος eas gubernet, nimis est notum. Et non est hic ea commoditas quae in Academijs, apud honestum aliquem ciuem cibi capiendi, nisi aut luxuriosè aut sordidè velim viuere. Medium reperire nihil possum. Sed quaerenda est occasio et boni consulenda, qualiscunque ea fuerit. Egit mihi et Ioachimus tuus gratias pro nullo beneficio. Quare et gratias agi mihi a vobis pudet, et non successisse quod penè pro explorato habebam, dolet. Itaque saepe mihi in mentem venit dicti tui, cum Norimbergae de Nosodochei quibusdam periculis conquerenti diceres: TE TVA FORTVNA SEQVITVR VT CAESAREM SVA. Sequatur igitur illa, quoniam me nec relinquere nec antecedere vult. Et quidem tam diu non sequetur, quam secuta est. In propinquo enim esse puto illud ἐλπίς καὶ τύχη μέγα χάρετε. Absit autem (quod tu olim lusisti) vt in portu faciam naufragium. Interea velis remisqué nauigabimus in hac scholastica palaestra, cum qua nunc coniungitur ἐπτάλοφος βιβλιοθήκη, quae, si vixero et valuero, non quidem nullum, sed non iniucundum mihi laborem afferet sui et instruendi et ornandi. De Gallicis motibus magnum silentium post multiplicia mendacia. De quibus tamen ὁ γραμματοφόρος Valtherus de Morrous Carpenteracensis, ea quae feruntur exponere tibi poterit. Quem si commendatione tua iuuare poteris, scio te et humanitatis et mea etiam causa facturum esse. Inseruit Comiti λεοντολίθῳ, commendatus mihi est a D. Conrado Peutingerero Claudij F[ilio] Conradi nepote. Sperat se occasionem Lipsiae inuenturum docendis literis Gallicis sustentandi sui, et non paruam in te spem habet. Quae ne eum frustretur, etiam atque etiam oro. Vale. Idibus Augusti natali meo 1562.

Hiero[nymus] Wolfius et  
 tui et tuorum studio-  
 sissimus, modò  
 ne fortuna nostra  
 impediremur.